

13. maj

Upernaakkut 2017-imi ataatsimiinnissamut ilaqutariit pissakinnerusut akunnattumillu aningaasarsiallit nammineerlutik illutaarsinnaanerit pillugu Naalakkersuisut suliniuteqaqqullugit Inatsisartut aalajangiiffigisassaattut siunnersuut.

(Inatsisartunut ilaasortaq Anthon Frederiksen, Partii Naleraq)

Inatsisartunut ilaasortaq Anthon Frederiksen, Partii Naleraq matumani siunnersuutaanut Siumumiit qutsavigiumavarput, Siumumiillu imaattumik oqaaseqaateqassaagut.

Ukiuni kingullerni Inatsisartuni sinerissami innuttaasut ineqarniarnerannut tunngassuteqartut anner-tuumik eqqartuiffigisarpagut. Oqallitarnerni erseqqaarippoq innuttaasunut sumiikkaluartunut tama-nut ineqarniarnikkut atugassarititaasut pitsaasuunissaannik oqariartuuteqartarnerit. Taamatuttaaq Naalakkersuinikkut siunniussaavoq ineqarneq pillugu iluarsartuusseqqittoqassasoq.

Siumumiit pingaaruteqarluinnartutut isigaarput innuttaasoq kinaluunniit akissaqartitsiffigisaminik kiisalu pitsaasumik najoruminartumillu ineqarnissaminut pisinnaatitaaffeqassasoq. Kialaamut iser-fissaqarluni angerlarsimaffeqarneq nunami maani pingaaqaaq, taamaattumik ineqarneq pillugu ilu-arsartuusseqqinnissat suliarineqarfissaasa nalerpiaani ineqarniarnikkut pissutsinut pitsanngorsaa-nermik siunertallit Siumumiit oqalliseqataaffigerusukkatsigik matumani oqaatigissavarput.

Miserrattissaanngilaq nunatsinni innuttaasut isertitakitsut kiisalu akunnattumik isertitallit akornanni ineqarniarnikkut atugarisaat amerlasuutigut unammillernartumiimmata tamaviaarnartumiillutillu. Ilaqutariit amerlasuut ineqarnermut akiliutissanut tamaviaarput kiisalu aamma ilaatigut illunut najugaqarfigineqarsinnaanngitsutut taaneqarsinnaasunut najugaqartillutigik. Tamassumalu illuatu-ngaanut saatinnessaa anguniassagutsigu ilaatigut siunnersuut manna aqputigalugu ilorraap tungaanut alloriarqarsinnaanera Siumumiit upperigigatsigu matumani oqaatigissavarput.

Oqaluttuarisaaneq qiviassagaanni ilaatigut nammineerluni illuliorsinnaanerup periarfissaanerani illorpassuit angissutsimikkut pitsaassutsimikkullu ullutsinnut naleqquttut ikigisassaannigitsut piler-sinneqarsimapput, nunaqarfimmiunut isorliunerusormiunut taamatullu ilaqutariinnut isertitakitsunut akunnattumillu isertitalinnut annertuumik iluaqataangaartumik.

Nammineerluni illuliorsinnaanerup Sanaqateqarluni illuliorsinnaanermut allanngortinneqarnerata kingorna piffinni taakkunani taamatullu isertitakitsut akunnattumillu isertitallit akornanni taamaat-tunik sanaartortoqarnera annikilleriangaatsiarsimavoq, imaluunniit sanaartortoqarunnaavissimalluni. Tamannalu ajusaarnartutut Siumumiit isumaqarfigaarput qanorlu iliuuseqartoqartariaqarnera Siu-mumiit kissaatigaarput.

Siumumiit isumaqarpugut inuiaqatigiit aningaasaleeqataaffigisaanni namminerisamik illutaarsin-naanermut initaarsinnaanissamulluunniit periarfissaasut suulluunniit inuiaqatigiinnut tamanut peri-arfissiissutaasinnaasariaqartut, isertitakitsuugaanni isertitagissaartuugaaniluunniit. Nammineerluni illorliorsinnaanerup ammaateqqinneratigut ilaqutariit amerlasuut ineqarniarnikkut atugaannik aju-nngitsumut saatitsinermik kinguneqarsinnaasoq Siumumi upperaarput.

Taamaattumik sanaqateqarluni illuliorsinnaanerup isumaa siunertaalu ajunngikkaluaqisut nunaqarfimmiunut, isorliunerusi najugalinnut taamatullu isertitakitsunut akunnattumillu isertitalinnut periarfissap ajornarnerulersimanera miserrattissaanngilaq, ilaatigut piumasaqaataasut nutaat assi-giinnngitsut kiisalu aningaasaleeriaatsinut tunngasut sakkortusineqarnerisa kingunerisaannik.

Nunaqarfinni isorliunerusunilu najugallit ilaatigut tassaakkajupput sulisartut allallu akissarsiakitsut, taamaattumik maannakkutut aqqissuussineq aqqutigalugu ileqqaagaqarsimanngitsunut sanaqateqarluni illuliorsinnaaneq ajornakusoortorujussuusinnaavoq, tassami aningaaseriviit pingaartumik ukiuni makkunani taarsigassarsititsisarnerat ajornakusooqqimmat, pingaartumik isertitakitsuu-gaanni.

Inissiat attartortittakkat eqqarsaatigalugit attartortumiit piginnittuunermut periarfissarititaasup siunissami atorluarneqarnerulersinnaanera Siumumiit aqqutissiuukkusupparput, maannamullu misilitagaareersut aallaavigalugit aporfiusinnaasut nalilersorlugit aqqiissuteqarfigalugillu.

Siumumiit taamatut oqaaseqarluta siunnersuut Sanaartornermut ataatsimiititaliamut ingerlatinneqar-nissaa inassutigaarput.

Anders Olsen
Siumut